



## **PRESS SECRETARIAT**

**MINISTRY OF THE PRIME MINISTER & CABINET**

**Apia, Samoa**

Telephone : (685) 63222 ext 746, 747, 748, (685) 24799, (685) 26397

Fax : (685) 26322 Email: [pressecretariat@samoa.ws](mailto:pressecretariat@samoa.ws)

**Press Release**

**22 Fepuari, 2008**

### **1. Fono Lona 52 Komisi mo Tulaga o Tina ma Tamaitai a Malo Aafaatasi.**

Ua faamaonia e le Kapeneta le auai o le usugafono a Samoa mo le uluai taimi i le Fono Lona 52 a le Komisi mo Tulaga o Tina ma Tamaitai a Malo Aafaatasi, e usuia i Niu Ioka, aso 25 Fepuari i le aso 7 Mati, 2008.

E taua le auai o Samoa i lenei fono aua le atiina ae lautele o Tina ma Tamaitai i totonu o le atunuu. E lē gata i lea, ua avea foi Samoa ma Malo Auai o le Feagaiga i le Tafieseaa o soo se Faailoga Tagata Faasaga i Tina ma Tamaitai.

E taitaia le usugafono a Samoa e le Afioga i le Minisita o le Matagaluega Tina ma Tamaitai, Atinae o Nuu ma Afioga ma Agafesootai, Afioga Fiamē Naomi. E auai i le usugafono le Ofisa Sili o Pulega faapea le Ofisa Sili o Pulega Lagolago.

### **2. Lipoti Sui Palemia mo Fono i Peleseuma ma Ueligitone.**

Ua faamaonia e le Kapeneta le lipoti o fono sa auai le Afioga i le Sui Palemia, Afioga Misa Telefoni, i Peleseuma ma Ueligitone.

#### **Fono i Peleseuma:**

O le aso 22 Ianuari, 2008 sa fai ai le lauga a le Afioga i le Sui Palemia i le Fono a Sui o le Faalapotopotoga a Malo o Aferika, Karepiane ma le Pasefika, le ACP. O le aso lava lea na feiloai atu ai i le Fono Tuuafaatasi a Sui o le ACP ma le Faalapotopotoga a Malo o Europa, le EU, ma faatalanoaina ai mataupu e aafia ai le: faamaonia e le 2/3 o atunuu o le ACP o le Feagaiga i Cotonou; filemu o atunuu o loo aafia i taua; fesootaiga faaauau i le va o le EU ma le ACP e ala i le Tofi Peresetene e pei ona umia e Samoa; lagolagoina e le EU o le vave faamae'a o mataupu tau i le Puipuga o le Siosiomaga a Aferika ma le Pasefika.

Sa feiloai atu foi le Afioga i le Sui Palemia i le Afioga ia Jose Barnoso, le Peresetene o le EU, Sir John Kaputin, le Failautusi Aoao o le ACP, faapea foi Andre Ster, le Peresetene fou o le EU, ma matauina ai le taua o le faaauauaina o feiloaiga i le lumanai a nei peresetene o faalapotopotoga e lua.

Sa faamavae le Sui Palemia mai sui sinia a le ACP e tusa ai o le maea aloaia o lona tofiga i le tofi Peresetene i le aso 31 Ianuari, 2008.

**Fono i Ueligitone:**

Sa malosi le unai o faasalalauga i nusipepa ma televise i le taimi o le Fitu a Ueligitone e faatosina mai ai turisi i Samoa. Na matauina le taua o le tuufaatasi o polokalame faatosina a le Pulega o Tagata Tafafao Maimoa a Samoa ma taaloga a le Manu Samoa, ona o le taua o le faalauiloaina o Samoa e ala i taaloga. Sa faia foi ni Malaga Faalauiloa i Aukilani sa auai atu i ai le Afioga i le Sui Palemia.

**3. Fono Lona Sefulu Komiti Faafoe Faalapotopotoga o le Siosiomaga o le Lalolagi (UNEP); Mafutaga Minisita o Siosiomaga o le Lalolagi.**

O loo i ai nei i Monaco le usugafono a Samoa e auai i le Fono Lona Sefulu a le Komiti Faafoe a le Faalapotopotoga o le Siosiomaga o le Lalolagi, le UNEP, faapea ma le Mafutaga a Minisita o Siosiomaga o le Lalolagi.

O le fono faaminisita e soālaupule ai fuafuaga ma galuega a le UNEP, le lālā o Malo Aufaatasi o loo faafoeina mataupu tau i le Siosiomaga o le lalolagi. O mataupu o le a talanoaina e aofia ai le: Faiga Faavae; faatinoga o faaiuga o fono tau Atiina Ae ma le Siosiomaga; faatinoga o le polokalame o galuega a le UNEP; ma le Tala o le Tupe 2008 – 2009.

O loo taitai'a le usugafono a Samoa e le Afioga Faumuina Tiatia Liuga, Minisita o le Siosiomaga, ma o loo auai foi ma le Afioga i le Minisita Lagolago, Tapuai Sepulona Moananu ma le Ofisa Sili o Pulega.

**4. Tofia le Pule Sili o le Faaputugatupe mo le Lumanai Manuia a Samoa.**

Ua faamaonia e le Kapeneta le tofia o le Susuga Esther Lameko Poutoa i le tofiga o le Pule Sili o le Faalapotopotoga mo le Lumanai Manuia a Samoa, le NPF, mo le tolu tausaga.

Na faasalalauina lenei avanoa ma e toasefulu ma le lua i latou sa tusi talosaga, a o le tofa o i latou na fainagalo le Komiti Faafoe e fai ai le iloiloga. I le mae'a ai o suesuega ma iloiloga, na filifili loa le Komiti e se'ei mai i lenei tofiga taua, o le Pule Sili o le NPF, le Susuga Esther Lameko Poutoa.

Na amata aoaoga a le Susuga Esther Lameko Poutoa i Samoa ma faauau ai i le Iunivesete a le Pasefika i Saute i Suva ma maua ai lona failoga o le BA Accounting and Financial Management i le 1997. Na maua foi lona failoga o le Masters in Business and Technology mai i le Iunivesete o New South Wales i le 2007. Sa faigaluega o ia i le Ofisa o le Suetusi Sili mo le sefulu ma le tolu tausaga, ma e tofia nei o ia i lenei tofiga taua o loo galue pea i le NPF i le tofiga o le Sui Pule Sili. O le Susuga ia Esther Lameko Poutoa, ua faaiipoipo atu i le Susuga George Poutoa, e tofa o la alo. O ia e mai i le alalafaga o Alafua ma o lana Ekalesia o le EFKS.

## **5. Fono Iunuvesite a le Pasefika i Saute.**

Ua faamaonia e le Kapeneta le auai o le usugafono a Samoa mo ni fono e faia a le Iunuvesite o le Pasefika i Saute i Suva, aso 25 – 26 Fepuari, 2008.

O le aso 25 – 26 Fepuari, 2008 e fono ai le Finance & Investments Committee. O le Komiti Faatonu e fono i le aso 28 Fepuari, 2008 a o le Komiti mo Tofiga e fono i le aso 29 Fepuari, 2008.

O le Afioga Fiamē Naomi Mataafa, le Minisita o Tina ma Tamaitai, faapea le Susuga Hinauri Petana, le Failautusi o le Ofisa o le Tupe, o sui ia o Samoa mo nei fono taua.

**Government Press Secretariat.**